

Date – 22/07/2025
Time - 7:30 -7:40Hrs
AKASHVANI AIZAWL

HEADLINES (MORNING)

1. **Dampa bialtu MLA Pu Lalrintluanga Sailo chu nizan khan Delhi-ah a thi a, vawiin hian Aizawl lo thlenpui tum a ni.**
2. **Kawnpui leh Sairang inkar kawngchhe zualpui hnawh nan sorkarin cheng nuai 100 a ruahman a, zaninah hna an thawk tan nghal ang.**
3. **Vice President Jagdeep Dhankar chuan a hriselna chhuanlamin a nihna atangin a bang.**
4. **Parliament fur thutkhawm chu vawiin khan tan a ni.**

<><><>

DAMPA MLA DIED

Dampa bialtu MLA Pu Lalrintluanga Sailo chu MAX Super Speciality Hospital, Delhi-ah nizan khan a thi a, kum 65 mi a ni.

Pu Lalrintluanga Sailo hi a khawsik nasat avangin June ni 29 khan Delhi panpui a ni a, Max Hospital-ah hian ni khat ward-a a awm hnuah ICU-ah dahluh a ni a, Rannung seh tih hmuhchhuah a ni.

Pu Lalrintluanga ruang hi vawiin hian Aizawl rawn thlenpui tum a ni a, ruahman lawk ang chuan zanin a an chenna Luangmual ah lumenpui a ni ang.

MNF Party chuan an MLA, National Core Committee Member chuan an ui thu thuchhuah an siam a, a thihna chu MNF leh Mizoram tan channa nasa tak a ni an ti a, ram leh hnam, sakhaw humhim tura a hnathawh kal mek chhunzawm zel turin MNF chuan theihtawp a chhuah zel ang an ti a ni.

Governor, Lt Gen Retd VK Singh, Chief Minister Pu Lalduhawma, MPCC President Pu Lalthanzara ten an ui thu thuchhuah siamin an sawi bawk a ni.

<><><>

KAWNPUI-SAIRANG ROAD

Kawnpui leh Sairang inkar kawngchhe zualpui hnawh nan sorkarin cheng nuai 100 a ruahman a, zaninah hna an thawk tan nghal ang.

Nimin khan Chief Minister Pu Lalduhoma hovin Mizoram kawngchhe chungchang sawihoa thutkhawm a ni a, he hunah hian PWD Minister Pu Vanlalhlana, PWD hotute leh Finance Department hotute an tel a. Kawnpui -

Buichali - Sairang kawngpui chu NHIDCL te kuta awm, state sawrkar mawhphurhna ni tawh lo ni mah se, nitin chak lakna pui ber a nih avangin nikum lama sawrkarin a lo hnawh tawh angin, kuminah pawh a zualpui hnawh leh mai ni se, an ti a. Hnathawh nan cheng nuai 100 an ruahman nghal a ni.

Darlak - Tuidam inkar kawng chu a kawng thar zawk sialtu contractor te an tlakchhiat avangin an contract tihtawp loh theih lohvin an awm thu thutkhawmah hian tarlan a ni a. Tender thar chhuah dilna central sawrkarah a awm mek thu leh he dilna hi chak taka umzui mek a nih thu tarlan a ni a. A helna, kawng hlui, tuna hman mek chu PWD lamin a zualpui lo thawm tha se tiin an rel a, cheng nuai 20 an ruahman a ni.

VC

Chief Minister hoa Mizoram kawng chungchang thlirhonaah hian kawngchhe thawm tura an rel te bawhzuitu tur Coordination Committee, Secretary PWD kaihhruaina hnuaiah din a ni a. Anni hian hmanraw mamawh te lakhawmin zanin atangin hna an tan dawn a. NHIDCL lam pawh na zawka nawr ni se, central sawrkarah pawh a tul anga hriattir ni se tiin an rel bawk a ni.

Thutkhawmah hian Mamit - Bairabi kawngpui chu a grade a tha na a, khuar erawh a tam rih thu tarlan a ni a. He kawngpui hi hman theiha a awm reng theih nan a tul lai apiang thawm that ni se an ti a. He kawngpui hi engemaw thulha Kolasib lam kawngpui a lo pin pawha hman theih niin a thawm that nan cheng nuai 65 pek chhuahn se tiin an rel bawk a ni.

Hetihlai hian, Mizoram Oil Tanker Drivers' Association (MOTDA) President Pu Romel Lalruatdika chuan kawngchhia avanga an tuialhthei phurh an chawlhsan chu chhunzawm zui ni se an ti tih a sawi a ni. MOTDA hian kar kalta Zirtawpni khan thuchhuah siamin Kawnpui atanga Sairang inkar kawng chhia chu Oil Tanker tlan nan a him loh avangin kawngchhia hi tlan theih pangngaia siam a nih hma chuan an lirthei din tir an tum thu an sawi a ni.

VC

MOTDA President Pu Romel Lalruatdika chuan Thawhlejni hian kawngchhia chu a hmunah an pawl hrulaituten tlawh an tum naa Fak Hlawh Lo Val Rual pawl ten kawngchhia chungchang sawiho turin pawl hrang hrangte an kohkhawm avangin an tlawh thei rih dawn loh tih a sawi a. Pawl hrang hrang kalkhawmin an rorel azirin an awm dan a danglam theih thu sawiin hetihrual hian tun dinhmunah chuan tlan theihna tura kawng siam that a nih hma chu din rih an la tum thu a sawi a ni.

<><><>

JCSM

Joint Civil Society of Mizoram (JCSM) chuan Kawnpui leh Sairang inkar kawng chhe lai tawite chu rang taka siam turin NHIDCL an phut thu leh darkar 48 an ngaihchan dawn thu an sawi.

JCSM hotute hian Aizawl Press Club-a chanchinbumite an kawmnaah he thu hi sawiin kawng chhe zual lai chu kilometre khat pawh tlinglo nia an ngaih thu an sawi a, tun dinhmunah NHIDCL hian hna thawk lovin a hmuna khawl an chhawp pawh kawng chhe siam tur niloin lirthei tang hnuk chhuak tur mai a nih thu an sawi a ni.

JCSM chuan kawngchhia avanga lirthei lian tangkhangin nasa takin Khamrang khaw mipuite tan harsatna a siam thu an sawi a. Lirthei a tangkhang zel a nih chuan Khamrang khua leh a chhehvel bakah truck khalhtute ei tur leh mamawh ngaihtuhsak thuai a tul an ti a. Hmalakna an hmuh loh chuan hnatlangpui koh mai an tum tur thu an sawi a ni.

VC
Mizoram chhunga kawngchhe kaihhnawihah Hachhek Constituency Maxi Cab Welfare pawhin, Tuidam to Darlak, Sabual lui lam kawng chu siamthat a nih hma chu Nilaini atanga tiam chin awm lovin an service dawn rih lo tih an sawi a. Kawng chhia bakah hian Oil Tanker te an nawrh avangin tuialhthei lamah harsatna a awm avang te, motor lian Balu phur leh adangte an tlan reng avangin kawngpui chu passenger leh motor tan a him tawh loh avangin an ding rih dawn tih an sawi a. Siamthat a nih veleh an service leh dawn an ti a ni..

Kawng chhiat vanga Tuialhthei phurte an tlanloh avangin, Lawngtlai District ah chuan Petrol leh Diesel ah harsatna a thlenloh nan DCSO Pu Lianchhuma Chinzah chuan Tuialhthei pekchhuah zat tur bituk a siam a ni.

<><><>

MIZO DIASPORA HUB

Ram hrang hranga Mizo pawl hrang hrangte inthlunzawmna tur apps Mizo Diaspora Hub chu nimin khan Chief Minister Pu Lalduhoma’n a hawng.

Mizo Diaspora Hub hi khawvel hmun hrang hranga Mizote inthlunzawmna tura ruahman niin Mizo Diaspora Cell enkawlna hnuaiah a awm dawn a, a tum ber chu state hrang hrang leh ram hranga zofate inunauna nghet zawk leh inpuih tawn a awlsam theihna tur a ni.

Mizo Diaspora Cell Chairman Pu Vanlaldina Fanai chuan tun thla tir khan hriattirna ti chhuakin Mizo Diaspora Hub ah inziak lut theuh turin a ngen thu a sawi a, tarlan danin he Diaspora Hub hi LushAITEch te nena inremna an ziah anga siam a nih thu leh hman nghal theiha dahchhuah a ni a. State pawna cheng zofate inhriatpawhna leh a tul anga intanputawwna tur te, sawrkar hmalakna an lo hriat zung zungna tur leh sawrkara an mamawh an thlen theihna tur a nih thu a tarlang bawh.

<><><>

SAMTHANG HARVEST

Champhai district chhunga Samthang khuaah chhungkaw 145 ten kuminah Zikhlum an chinga, zikhlum thar vanglai takin a hralhna lamah harsatna an tawh avangin, kawng hrang hrang an dap a,

East Tuipui bialtu MLA Pu Ramthanmawia chuan a bial chhung Samthang khuaa Zikhlum chingtute hnenah an Zikhlum thar phurhna senso atan cheng singnga a pe a ni.

Samthang zikhlum chingtute puih nan hian Aizawl khawpuia Branch hrang hrang YMA ten Aizawla zawrh pui dan tur an duang hlawm ni a thudawn a ni a. Samthang atanga thu dawn danin nimin khanZikhlum an thawn chhuak a, heng zikhlum te hi Tuikual North YMA Hall panpui anih hnuah veng hrang hrangah sem chhuah a ni ang a, tunkar Ningani ah a dang an thawn chhuak leh ang.

Aizawl City branch YMA- Bethlehem Vengthlang te, Mission Veng te, Luangmual ten Samthang Zikhlum an zawrh sak tur thu an puan tawh bakah Tuikual North Branch YMA, Bethlehem Branch YMA, Republic Branch YMA, Luangmual Branch YMA, Zonuam Branch YMA, ITI Branch YMA leh Chaltlang Branch YMA ten tukina Aizawl thleng tur hi an lo kutken dawn a, Mission Veng leh Bethlehem Vengthlang ten Ningania thleng tur an lo kutken ve thung dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

VICE PRESIDENT

Vice President Jagdeep Dhankar chuan a hriselna chhuanlamin a nihna atangin a bang. Nizan khan Pu Dhankara hian President Droupadi Murmui hnenah banna hi a thehlut a. A hriselna chu a ngaihpawimawh thu leh doctorte thurawn avangin banna chu a thehlut tih a tarlang a. A hna a chelh chhunga president thawhpaina zawng zawngah lawmthu a sawi a. Prime Minister Narendra Modia leh a thawhpui Council of Minister te chungah lawmthu a sawi baw k a ni.

<><><>

PM

Parliament fur thutkhawm chu vawiin khan tan a ni a. Thlaleh August ni 21 thleng neih tur a ni.

Prime Minister Narendra Modia chuan tun tum fur Session chu hlawk taka hman a beisei thu leh sawihona tha tak an neih theih a beisei thu a sawi. Tukina sesson tan hmaa Parliament tuala chanchinbumite a kawmnaah he thu hi sawiin Pu Modia chuan

mipui rorelna sawhnghehin a awm dawn tih a sawi a. Session an neih thin chu mi tinin theihtawp chhuaha ram tana an hnathawh lanchhuahna anih avangin ram tana hun ropui tak anih thu a sawi ni.

